

Repower fa 41 milliuns gudogn

In bun onn da fatschenta per il concern d'energia grischun

MARTIN CABALZAR/FMR

■ **Il concern d'energia grischun ha fatg 2020 in gudogn da 41 milliuns francs ed ha pudì augmentar il resultat operativ sin 77 milliuns. Quai èn 18% dapli che l'onn precedent. Chantun e vischnancas han pudì profitar da 18.3 milliuns entradas da concessiun.** Er tar Repower è l'andament da gestiun vegnì influenzà 2020 fitg da la pandemia da covid-19. «Il provediment d'energia è dentant stà garantì permanentamain e la digitalisaziun dals process da lavur ha obtegnì in nov stimpel», constatescha il schef operativ *Roland Leuenberger*. Las consequenzas negativas sin il manaschi sajan stadas pitschnas, la reduziun dal volumen e da las marschas hajan pudì vegnir cumpensadas tras la dumonda creschenta per energia regulara sin il martgà talian.

In bun resultat operativ

Il resultat operativ (EBIT) serra cun 77 milliuns (+18%) danovamain meglier che l'onn precedent. Malgrà quai sa sbassa il gudogn da la gruppa sin 41 milliuns (-18%). D'attribuir seigi quei, tenor il schef da finanzas *Lorenzo Trezzini*, cunzunt a las perditas da taglias chaschunadas en ils onns precedents e che sajan uss dentant cassadas entiramain. Cun ina prestaziun totala da 1.7 milliardas francs saja Repower tuttina anc per 11% sut la limita da l'onn passa. Quest reduziun



Il pli grond implant fotovoltaic da tut l'Engiadina ha Repower realisà 2020 sin l'areal da la sarinera da S-chanf.

FOTO REPOWER

saja d'attribuir cunzunt a la dumanda smesada tar intginas interpresas pitschnas e mesaunas en l'Italia durant l'emprima unda da la pandemia, constatescha Repower. Resguardond il bun resultat operativ, l'agen chapital da 869 milliuns e la buna liquiditad propona il cussegl administrativ da conceder ina dividenda da trais francs per aczia.

Dapli aua, damain vent

L'onn passà ha Repower producì 2 951 milliuns uras kilowatt, quai èn 14% pli pauc che l'onn precedent. Pervi da las

nauschas relaziuns da vent è la produziun dals implants da vent en Italia stada sut la media. Cuntrari è la produziun d'energia en ils implants idraulics stada per radund 10% pli auta che la media da blers onns. Quai causa a la blera plievgia dals mais zercladur, avust ed october ed a la marschauna regulara da naiv che ha favurisà la produziun da forza idraulica. Ina reduziun marcanta da la produziun hajan ins stuì registrar tar l'implant da gas cumbinà a Tervola. Tuttina haja quest implant pudì contribuir essenzialmain a la stabilitad

da la rait en l'Italia, constatescha *Roland Leuenberger*.

Investiziuns en energias regenerablas

En il decurs dals ultims onns ha Repower investì bler en energias regenerablas. Uschia ha Repower Renewable realisà en l'Italia 12 ulteriurs implants fotovoltaics cun ina prestaziun totala da 14.3 megawatts. Plinavant ha Repower mess en funcziun il november 2020 a S-chanf il pli grond implant fotovoltaic en Engiadina, cun ina prestaziun da 1.1 megawatt. La stad 2020 ha Repower dà l'emprima badigliada per la renovaziun totala da l'implant idraulic da Robbia en Valposchiavo, in'investiziun da radund 125 milliuns. Plinavant vegn renovà l'implant idraulic da Madulain per 2.3 milliuns. Per stabilisar la segirtad da la rait da provediment ha Repower er investì radund 27 milliuns, sco quai ch'il schef da finanzas *Lorenzo Trezzini* ha infurmà ier a la conferenza da bilantscha emessa per livestream.

Entant che corona aveva effectuà la primavaira passada ina reduziun massiva dals pretschs d'energia èn quels sa revegnids ferm vers la fin da l'onn. Grazia a sia strategia d'impresa diversifitgada saja reussì d'obtegnair ina fitg gronda incarica en il sector d'electromobilitad dal chantun Turi, constatescha il CEO *Roland Leuenberger* cun satisfacziun. Per 2021 quinta Repower cun in restabiliment da l'economia en Svizra e cunzunt en l'Italia.